

Date – 19/09/2024

Time - 18:30 Hrs

1. ‘Bana Kaih Scheme 2024’ chu vawiin khan Chief Minister Pu Lalduhoma’n a tlangzarh a, Mizorama thlai 4 bakah Kolasib leh Mamit District chhunga Buh tharte chu kg khat cheng 30 zelin an lei dawn tih a sawi bawk.
2. Ramchhunga chawlhkar hnih chhung aw h tur faina beihpui thlak, Swachhata Hi Seva chu Mizoramah pawh uar taka kalpui mek a ni.
3. Prime Minister Narendra Modia chuan tun thla ni 21 atanga ni 23 chhung hian US a tlawh dawn.
4. Union Ministry of Petroleum and Natural gas chuan NDA sawrkar term thumna ni 100 chhungin thutlukna pawimawh tak tak siam anih thu a sawi.

<><><>

HAND HOLDING POLICY

Mizoram sorkar hmalakna lian ber ni tura duan, ‘Bana Kaih (Mizoram Hand-holding) Scheme 2024’ chu vawiin khan Chief Minister Pu Lalduhoma’n a tlangzarh a, an intiam tawh angin thlai thar pali an lei dawn tih sawiin, chumi atan chuan pawisa pawh an dah tawh, a ti a. Kuminah hian a bul tan nan Kolasib leh Mamit District chhunga Buh tharte chu kg khat cheng 30 zelin an lei nghal dawn tih a sawi bawk.

‘Bana Kaih Scheme’ hi Aizawl Vanapa Hall-ah tlangzarhin Chief Minister chuan, thawkrim, taima leh tumruhte tan Mizoram sorkar a ding dawn, a ti a. Sorkar hmalakna dawng tur leh chang turin party induhsakna leh party-a inziah luh kher a ngai dawn lova, party mi ten thlang loin a thlang tur bika ruat ten endikin an thlang thin dawn a ni, a ti a. Bana Kaih chu hun rei tak atanga an lo suangtuah tawh ni mah se sorkarna an chan har avangin an kalpui har tih pawh sawiin, Pathianin a hun takah Kalphung Thar Mipui Sorkar a tun dinsak a ni, a ti.

Chief Minister chuan, an intiam tawh angin thlai thar pali an lei dawn tih sawiin, Sawhthing leh Aieng te Geographical Indication (GI) Tag an ti fel tawh a, khawvel hmun hrang hrang atang pawhin Mizoram thar a ni tih a hriat theih dawn niin a sawi a. Nakinah chuan QR Code pawh siam tum a nih thu sawiin hei hi Mizoram thlai thar bik chhinchhiah theihna tur a ni, a ti.

Thlai thar 4 te society kaltlanga lei tura ruahmanna duan a nih thu pawh sawiin, society chu politics tel lo, hruaitu tha leh mi thahnemngaite kaihhruai a ni tur a ni, a ti. Rate tha zawk Rs 50/- chunglama sawhthing hralh theite chu sawrkarin a buaipui dawn lova, Rs. 50/- tling lova an hralh erawh chuan a tlin lohna zat kha sawrkarin a hnawkhah sak thung ang, a ti.

Pu Lalduhoma chuan, kuminah hian a bul tan nan Kolasib leh Mamit District chhunga Buh tharte chu kg khat cheng 30 zelin an lei nghal dawn tih sawiin.. District pahnih an thlan chhan chu sokar tlin tawh a ni rih tih sawiin, kum thar atang chuan zau leh lian zawka hmalak tum a ni, a ti a; buh tui chi chin tur niin a theih chuan Ration Buhfaiah pawh Mizo thar ngei pek theih tum a ni, a ti.

Agriculture & Farmers Welfare Minister Pu PC Vanlalruata pawhin thu sawiin, Mizorama sorkarna chang tawh hrang hrang ten ram a dam theih nan damdawi hrang hrang an chawh thin a, sorkar kal hmasa te khan theihtawp an lo chhuah tawh thin a. ZPM pawhin kut hnathawk leh Entrepreneur te khai chhuah a duh a, chumi atan chuan Bana Kaih hi a duang a ni, a ti.

Mizoram State Policy Coordination Committee (MSPCC) Member Secretary Pu Lalmalsawma Pachuau sawifiah dan chuan, Bana Kaih thil tum chu hmasawna tlo leh tluantling hmanga Mizoram chu ram changkanga hlan kai a ni a. Mi pakhatin kum khat chhunga chawhruala a lak luh zat (Capita Income) tihsan tum niin, tun dinhmunah Mizoram Per Capita Income chu Cheng Nuai 2 leh Sing 4 vel anga chhût a ni a, ram changkang te chu Cheng Nuai 80 vel bawr a ni thung.

Bana Kaihhi ZPM kaihruai Mizoram sorkarin puih tlak te khai chhuah theihna tura ruahmanna a siam a ni a, Cheng Nuai 50 thleng Loan dil theih a ni a; India khua leh tui dik tak - kum 18 chung lam Mizorama cheng nghette tan dil theih a ni a, Mizoram sorkar emaw sorkar laipui emaw hnuai thawk tan erawh dil theih a ni lo.

A kengkawh turin sorkar Department hrang hrang 16 ruat an ni a, scheme hian Mizoram chhunga District hrang hrang 11 a huam vek ang. Loan la zinga a pung rul tha te chu Mizoram sorkarin a pung a pe let dawn a. Loan la turin dahkham a ngai dawn lo va, sorkar chu Guarantor a ni ang. Loan rul tha lo te erawh sorkarin a rulhsak dawn lo thung. Chief Minister sawi dan chuan Loan atan hian Bank hrang hrang SBI, MRB leh Apex Bank te nen inremna an ziak dawn a ni.

<><><>

SWACHHATA HI SEVA

Ramchhunga chawlhkar hnih chhung awh tur faina beihpui thlak, Swachhata Hi Seva kalpui mekah vawiin khan Urban Development & Poverty Alleviation (UD&PA) Department, Lunglei leh Young Mizo Association (YMA) Lunglei Rahsi Veng Branch leh Lunglei District Adventure Club te tang ho chuan Lunglei Rahsi Veng leh Sazaikawn inkar kawngpui thlanga bawlhhlawh paihna hmun ni lova bawlhhlawh paihte an thian fai.

Swachhata Hi Seva puala District Steering Committee-in Lunglei khawpui huam chhung -a vantlang hmunhma then fai ngai bik a ruahman pariat zinga pakhat a ni a. Hma lakna tur ruahmanna duan sa angin Lunglei District Urban Development Officer (DUDO) Pu C. Sawihlira hovin vawiin khan Rahsi Veng CTU then fai hnatlang hi thawh a ni a. UD&PA Lungleia thawktute, Rahsi Veng Branch YMA member-te leh LDAC member-te atangin mi 60 chuang an thawk chhuak a ni. Lunglei khawpui chhungah Lunglei Municipal Council (LMC) chuan veng parukah bawlhhlawh khawnin, a bak veng dangah chuan Local Council-te ruahmannain bawlhhlawh khawn hi kalpui a ni a. Hetih lai hian mahni veng chhung bawlhhlawh paih ruala paih lo, a hranpaa mahni remchan dana bawlhhlawh paih leh khualzin veivak lirthei atanga bawlhhlawh paih mai thin an la awm avangin bawlhhlawh paihna hmun ni lova bawlhhlawh paih hmuh tur mit tikham tak tak eng emaw zat a la awm a. UD&PA chuan he'ng hi a remchan dan anga thian fai turin ruahmanna siamin, tun Swachhata Hi Seva kalpui mekah pawh hian he'ng a paihna hmun ni lova bawlhhlawh paihte hi then fai mek zel a ni.

Vawiin vek khan Hnahthial District, District Aids Prevention & Control Committee buatsaihin Horeb Lodge Conference Hall-ah zirlaite tan Intensified IEC Campaign - India Fight Against HIV&STI pualin Debate competition huaihawt a ni bawk a. Tun thla ni 26 khian Flash Mob Dance leh Short Drama competition nei tura ruahmanin ni 27 khian Quiz competition buatsaih a ni bawk ang. Saitualah chuan District Hospitalah, District level steering committee on Swachhata Hi Seva 2024 buatsaih bawlhhlawh sawngbawltute hriselna endikna - Health checkup for sanitary workers neih a ni a.

He hun hi Dy. Chief Medical Officer, Dr Zothanpari Chhakchhuak chuan a hmanpui a. Bawlhhlawh sawngbawltute chu mahni invenna hmanrua, kutkawr, gum boot te hmang uar tura chahin bawlhhlawh an sawngbawlina kawngah natna hlauhawm tak kai theih a nih avangin mahni invawng fai a, sahbawn ngeia kutsil uar turin a fuih a ni. Dr. Zothanpari Chhakchhuak chuan inkaichhawn theih loh natna zingah BP sang leh zunthlum nei Saitual district-ah an pun zel thu sawiin, hemi laka inveng turin ei leh in bakah taksa insawizawi uar a ngaih thu a sawi. Vawiin Health checkup for sanitary workers programme hi Pu Albert Vanlalliantluanga, DUDO, UD&PA chuan a kaihruaia, bawlhhlawh sawngbawltute hriselna a thlawna endik niin UD&PA staff te leh Saitual District Hospital staff te an tel a ni.

<><><>

CHAMPHAI

Champhai District Child Protection Unit chuan Champhai District chhunga naupang venhimna kawnga thawktute tan Capacity Building on Acts Related to Children chu DC Conference Hall, Keifangtlangah an buatsaih a. He hunah hian naupang venhimna kaihhnawih dan hrang hrang te zirho a ni a. Pu K. Zorammuana, Addl DC chuan a hmanpui. Pu Zorammuana chuan naupang venhim kawngah tlawmngai pawl te hnathawh chu a fakawm a tih thu sawiin, mipui leh sawrkar inkara palai hna an thawhna chuan mipui zirtir kawngah leh khawtlang siamthatna kawngah rah tha a chhuah a ni, a ti a. Tunlai thiamna sang zelah naupangte venhim a pawimawh

zual a, internet kaltlanga zirtirna tha lo an dawn tur te ven pui a, chhungkua atanga tan lak tlan a ngai a ni, a ti. Naupang vanduaina tawk te pawhin thawh chhuahna hun tha an neih theih nan hriatthiamna nen a enkawl turin kalkhawmte chu a chah a. Champhai District-a naupang enkawlna te inenkawlna chu tha thawkhat a a hriat thu a sawi a, hmasawna nei zel turin duhsakna a hlan a ni. He hunah hian Champhai District chhunga naupang venhimna kawnga thawktu hrang hrang – Champhai District Executive Force hnuai Police Station pathum (Champhai, Zokhawthar leh Dungtlang) a thawktute bakah Excise & Narcotics Department leh Child Care Institutions enkawltute an tel a. Naupang venhimna kaihhnawihah zawhna leh chhanna hun bakah sawihona hun hman a ni.

<><><>

HEALTHY LUNGLEI

Lunglei District Health Society hma lakna Healthy Lunglei District Campaign hnuaihan vawiin khan Public Works Department (PWD), Lungleia thawktute tan natna inkai chhawn theih loh, Non-Communicable Disease (NCD) chungchang inzirtirna leh an hriselna dinhmun enfiagna -NCD awareness campaign & screening buatsaih a ni. PWD SE Conference Hall, Lungleia NCD awareness campaign & screening buatsaih hi PWD Lunglei Circle-a Sr Executive Engineer Pu Vanlalmuana Fanai chuan a kaihruai a. Hun hmanpuitu Lunglei Additional Deputy Commissioner Pu James Miahlung chuan Mizoramah NCD natna chi hrang hrang - BP sang, zunthlum, cancer, adt. a hluar thu leh sawrkar hna thawk zingah NCD vanga aikal lak ngai hriat tur an tam thu sawiin, he'ng natna hian ei leh in leh nun phungah harsatna a thlen bakah inenkawl nan sum tam tak sen a ngai thin a, vei lo turin nun phung uluk leh mahni inenkawl that a pawimawh a ni, a ti. He hunah hian UPHC Hrangchalkawn-a Medical Officer Dr VL Hrechianga chuan NCD awmzia sawi fiahin, NCD natna lan chhuah dan leh natna lo awm chhan bakah, NCD natna laka inven dan tur kawng hrang hrangte a zirtir a ni.

<><><>

PM

Prime Minister Narendra Modia chuan tun thla ni 21 atanga ni 23 chhung hian US a tlawh dawn. Vawiin khan Foreign Secretary Vikram Misri chuan New Delhi-ah chanchinbumite kawmin Prime Minister zin chhung hian thil pawimawh tak tak a ti dawn a. Chung zingah chuan rampawn lama India thawhpui te leh US a India mi chengte a kawm ang a. Prime Minister hian sumdawnna leh industry lama hotute a kawm dawn bawk a ni. Foreign Secretary sawidanin Pu Modia hian Quad Leaders' Summit Wilmington, Delaware ah hun a hmang dawn bawk a. Quad Summit karlakah hian ram hruaitute a kawm dawn bawk a. Idnia hian kum 2025 ah Quad Summit hi a thleng dawn bawk a ni.

<><><>

NDA 100 DAYS

Union Ministry of Petroleum and Natural gas chuan NDA sawrkar term thumna ni 100 chhungin thutlukna pawimawh tak tak siam anih thu a sawi. Thudawn danin tunhnai maiah sawrkar chuan Pradhan Mantri Jaiv Indhan Vatavaran Anukooi Fasal Awashesh Nivaran (PM-JI-VAN) Yojana chu a pawm a. He scheme hian a tum ber chu loneitute sum lakluh tihpun niin an huan thlai atanga bawhlhlahw leh boruak bawhlhlahw an siamchhuahte tihlem a ni a. He scheme hmang hian biofuel siam a ni ang a, technology thar leh ngaihtuahna thar nen project ruahman a ni ang. Hei bakah hian tualchhung mite tan eizawna thar siam sakin energy lamah intodelhna a thlen dawn a ni.

<><><>

PRESIDENT

President Draupadi Murmu-i chuan vawiin khan Safai Mitra Sammelan, Ujjain-a neihah thu a sawi. Pi Murmu-i chuan Ujjain-ah hnam nunphung leh khawsakna changkang tak Ujjain-a Mahakal-ah hian kum za tam tak chhung a lo awm tawh a ti. President Ujjain-Indore Six Lane Highway-ah internet kaltlangin Bhoomi Pujan a hmang bawk a ni. President Murmu-i chuan kum 10 chhungin Swachhata Abhiyan chu rampum huap campaign ah a chang chho a ti a. Hei hian ramchhungah inthlak danglamna nasa tak a thlen a ti a. Madhya Pradesh ah khawpui tam tak chu Safai Mitra Safe Cities ah puan anih tawh thu sawiin tuna Swachhata Bharat Mission thawh hnihnaah hian thianglimna kawngah a aia tha zawk an thleng dawn a ni a ti bawk. He hunah hian Madhya Pradesh Chief Minister Dr. Mohan Yadav leh Governor Mangubhai Patel te pawh an tel a ni.

<><><>